

1 San Pedro

Jesu gaji macari wanirãre gojabeoñumi Pedro

¹ Yũhũ Pedro Jesucristo ïgũ buhedore apidigũ ta ãhraa. Eropigũ mũare yoaro maja macarigue wanirãre, Ponto yebague wanirãre, Galacia yebague, Capadocia yebague, Asia yebague, Bitinia yebague wanirã sãre mũare árĩpehrerãre gojabeogũ iiaa yũhũ. Mũare õadore gojabeoa yũhũ. ² Negohraguere Goãmũ mari Pagũ “Õpa iigũra,” ïgũ arĩdiro dopa ta mũare beyepũ. ïgũ beyera pũhrũ ïgũ Espiritu Santo mera mũare Goãmũ yarã árĩmorãre acupũ. Õpa ta acupũ ïgũ Jesucristore õaro yũhrimorã mũa árĩboro dopa. ïgũ di cóãro mera ñerire coenirã mũa árĩboro dopa iipũ. Eropirã Goãmũ ïgũ mahiri mera õaro árĩque mũa.

Jesu yarã árĩrã marire mũarogue ïgũ aĩgãborore corerã iiaa mari, arĩ gojañumi Pedro

³⁻⁵ Goãmũ marire turaro mojomoro ïagũ, Jesucristo sĩridigũ ïgũ masa mũriaro mera marire õarã gohrotocũ iimi. Eropa iigũ ïgũ gohrotori mera Goãmũ porã ta wahaa mari. Eropa warã ïgũ mera eropa mari õaro árĩniguicãborore õaro masia mari. Eropigũ mũare ïgũ õari opaburire odiagũ mũare coregũ iimi. Iri mũare ïgũ oburi ne pehresome. Eropigũ ïgũre mũa umupeorãre Goãmũ ïgũ turari mera mũare ïhadibugũ, taricũ iigũcumĩ. Pehrerinũ árĩcũ

mũare ĩġu taurare masicũ iġucumi ĩġu. Eropirã ĩġu marire õaro mojomoro ĩacũ ĩarã, ĩġure Goãmũre mari Opũ Jesucristo Pagũre “Õagũ, turagũ ãhrimi,” arĩ umupeoro gahmea marire.

⁶ Eropa ĩġu taumorã árĩrã bũrigã mucubiriro gahmea. Mero i yeba mũa árĩropẽ, baja-suburi mũa ñero tariquererã ta bũrigã mucubiriro gahmea. ⁷ Eropa ñero tariquererã ta Goãmũre cóãbirã mũa árĩrã “Queoro Jesucristore umupeoa gũa,” arĩmasia mũa ĩġure. Mũa ñero tariquererã Jesucristore umupeoniguicũ mũa umupeoripũ yuju diaye árĩbeaa. Eropigũ mũa ñero taricũ ĩagũ “¿Árĩro ta mũa yũre umupeori?” arĩ queoñagũ iimi Goãmũ mũare. Mũa eropa ñero tarirã diaye ta Cristore õaro umupeoniguicũ “Õaro iiabũ mũa,” arĩġucumi Cristo mũare. Eropigũ Jesucristo dujarigũ mũa ĩġure õaro umupeoniguinirãre õaro ĩagucumi mucubiriri mera.

⁸ ĩġure Jesucristore ĩabiriquererã mahia mũa. Eropirã dohpaguere ĩġure ĩabiriquererã ta ĩġure “Diaye ta iġũ ãhrimi,” arĩ umupeoa. Eropa umupeorã turaro mucubiria mũa. Mũa eropa mucubirirã mũa Goãmũ pohro mucubiriboro dopa ta mucubiria. Mũare eropa mucubiricũ iimi Goãmũ. Eropirã turaro mucubiria. ⁹ Eropigũ Goãmũ mũare peamegue wabonirãre taricũ iġucumi mũa ĩġure õaro umupeoro mera.

¹⁰ Goãmũ ĩġu masare eropa tauborore iribojegue Goãmũ yare weremũhtanirã irire masidiarã serẽpi ĩamũriñuma. ¹¹ Cristo ĩġu ñero tariborore, ĩġu sĩridigũ masa mũriaborore,

árĩpehrerã tauro opũ ĩgu árĩborore erã ero coregue ta weremũhtañuma. Jesucristo ĩgu Espĩritu Santo ĩgu itamuri mera eropa wereñuma erã. Erã eropa weremũhtaquererã erã wererare masibiriñuma. Eropirã erã wererare õaro masidiarã serẽpi ĩamũriñuma erã Goãmure. ¹² Iri erã werera Jesucristo ariburi erã ya árĩburi árĩbiriyo. Mari õaro árĩburi árĩyo. Irire erãre masicũ iĩñumi Goãmũ. Eropirã dohpaguere umarogue obeodigu Espĩritu Santo ĩgu itamuri mera õari buherire mũare guã werea. Iribojegue mũa ya árĩburire erã weremũhtara iri ta árĩcãro tĩaa dohpaguere guã mũare wereri. Iri buherire anyua sã bũrigã masidiariñuma.

Goãmũ marire ñeri marirã árĩdoremi, arĩ gojañumi Pedro

¹³ Eropirã õarire guña masi árĩyuque mũa. Eropirã guhyadiaro árĩque. Cristo ĩgu dujaricũ Goãmũ mũare ĩgu õaro tauborore guñaque. Eropirã irire õaro mucubirimũhtarã coreque. ¹⁴ Iribojegue Goãmure masinibirãgue ñerire uaribejarã árĩmũrinirã árĩribũ mũa. Dohpaguere irire iibiricãque. Eropirã majirã erã pagũ sumarãre õaro yũhriro dopa ta Goãmure õaro yũhrique daja. ¹⁵ Eropirã ĩgu yarã árĩmorãre mũare sihubeodigu ñeri marigu ĩgu árĩro dopa ta mũa sã ñeri marirã ta árĩque. Eropirã õari dihtare iirã árĩque. ¹⁶ Eropa ta arĩ gojañuma Goãmũ yare erã gojarapũgue: “Ñeri marigu ãhraa yũhũ. Yũ eropa árĩcũ mũa sã ñeri marirã árĩque,” arĩmi Goãmũ, arĩ gojañuma.

17 Īḡu Goãmũ mari Pagu yujurãyeri árĩpehrerã erã iirare ĩagũ yujuro mera beyemi ĩḡu erãre. Īḡu eropiḡu árĩcũ ĩḡure “Ahũ,” arĩdiarã õaro iiquenerire uaribejarã árĩmũrine. I yeba mũa árĩropẽ ḡuhyadiaro mera õaro iique mũa. 18 Mũa ñecũ sũmarã mũra erã árĩricũri ne duhpiburi árĩbiriyo. Mũa sã erã iidiro dopa ta iinirã mũa árĩquerecũ ta Cristo mũare ĩḡu yarã árĩmorãre iimi. Mari wajamorire ĩḡu wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Irire õaro masia mũa. Eropa wajayebasagu ĩḡu niyeru mera, oro mera wajayebasabirimi. Niyeru, oro sã dederea waroca. 19 Īḡu di cóãra mera ta wajayebasami mari ñeri iira dipuwajare. Ovejagã erã Goãmũre obodigũ õagu ĩḡu árĩdiro dopa ta Jesucristo õagu ñeri marigũ árĩdigũ árĩmi. 20 Iribojeguere i yebare ĩḡu ĩhacũnuguboro coregue Jesucristo ĩḡu eropa waborore masituhapũ mari Pagu Goãmũ. Dohpaguepũre pehrerinũ coregã árĩcũ, Cristo sĩribasami mũare mũa ya árĩburire. 21 Eropirã Jesucristo ĩḡu itamuro mera Goãmũre umupeoa mũa. Goãmũpũ Cristore sĩridigũre masudigũ árĩmi. Eropigũ ĩḡure uamarogue apigũ, árĩpehrerãre ĩḡure umupeocũ iipũ mari Pagu. Īḡu eropiicũ ĩḡure mari Pagure “Diaye ta iigu ãhrimi,” arĩ umupeoa mũa. Mũa eropa umupeocũ õaro iimi mũare. Eropirã mũa ĩḡu mera õaro árĩniguiborore õaro masia mũa.

22 Õari buherire diaye majare yũhrirã mũa ñerire duhunirã ãhraa mũa. Eropa árĩrã, diaye

ta mari acawererã Jesu yarãre mahi umupeomasia mũa. Eropirã mũa mera majarãre mũa sïporãri mera turaro mahi umupeoque. ²³ Mũa dipaturi masa dehyoaro dopa ta Goãmũ porã wahabũ mũa. Mari pagũ sũmarã mera masa dehyoanirã árĩrã, pũhrũ sïria warãca. Iri iro dopa árĩbeaa Goãmũ porã mũa wacũ. Goãmũ mera árĩniguicãrãca. Goãmũ ïgũ buheri mera ïgũ porã wahabũ mũa. Iri buheri pehrebiriburi buheri marire Goãmũ mera eropa árĩniguicũ iiaa. ²⁴ Ōpa ãhraa Goãmũ yare erã gojarapũ:

Árĩpehrerã masa taa iro dopa wahama. Eropiro õari erã opari sã gori iro dopa ãhraa. Taa masa, sïria wahaa. Gori sã masa, sïria wahaa. Iri taa iro dopa ta mari masa sã wahaa. ²⁵ Mari Opũ ya buheripũ ne pehresome. Ïgũ arĩdiro dopa ta eropa waroca, arĩ gojañuma.

Iri buheri mũare erã werera õari buheri ta Jesucristo marire tauburi buheri ta ãhraa.

2

¹ Eropirã árĩpehreri ñeri iire, erã pũrũpũrũ erã ñero ii corerire, gajirã gajinore opacũ ïhaturire, gajirã ñeri quere moarire, ïrire duhuque mũa. ²⁻³ Mari Opũ mũare õaro ïgũ iire dabero masituhaa mũa. Eropirã ne masa dehyoarãgã apĩcore erã gamero dopa ta mũa sã õari buherire Goãmũ yare turaro gameque. Eropa ïgũ yare gamerã mũa ïgure mũa guñaturanemorãca. Ïgũ yarã õaro pee masirã árĩrãca.

*Cristo ojocaricũ iigu ʉtāye iro dopa árĩgu
ãhrimi, arĩ gojañumi Pedro*

⁴ Cristo ojocaricũ iigu ʉtāye iro dopa árĩgu
ãhrimi. Masa Cristore gamebirima. Erã
gamebiriqerrecũ Goãmʉpʉ ĩgu Pagʉpʉ ĩgʉre
beyedigʉ árĩmi. Ōatariaguã hrimi. ĩgu eropa
árĩgu árĩcũ ĩgʉre gameque. ⁵ Eropirã mʉa Jesu
yarã árĩrã mera Goãmʉã hrimi. Eropirã yujuro
mera ĩgu yare õaro iirã árĩque mʉa. ĩgu ya
árĩburire mʉa iimorãre beyedigʉ árĩmi. Eropirã
mʉa Jesucristo itamuri mera ĩgu yare õaro iirã
ĩgu Goãmʉre mucubiricũ iiaa. ⁶ Ōpaã hraa
Jesucristore Goãmʉ yare erã gojarapũ:

Cristo ʉtāye iro dopa yʉ beyedigʉã hrimi.
Eropiguã õatariaguã hrimi. ĩgu mariro
yaharã wamasibeamã. Eropiguã ĩgʉre
Jerusaléngue dohpague apiguã iiaa. ĩgu
masare õaro árĩcũ iigʉcumĩ. Eropirã
ĩgʉre umupeorã mucubiriniguãrãcoma,
arĩmi Goãmʉ, arĩ gojañuma Goãmʉ yare
weremʉhtanirãgue.

⁷ ĩgʉre umupeorãpʉ “Ōatariaguã hrimi,”
arĩrãcoma. ĩgʉre umupeobirãpʉ ñero
warãcoma. Erãre õpaã hraa Goãmʉ yare erã
gojarapũgue:

Ihĩ Cristo ʉtāye iro dopa ta Goãmʉ beyedigʉ
ãhrimi. ĩgu Goãmʉ beyedigʉ árĩquerecũ
masa ĩgʉre gamesome. ĩgʉre game-
biriqerrecũ Goãmʉ ĩgʉre opʉ acumi
árĩpehrerãre dorebure, arĩ gojañuma.

⁸ Ō sãre arãã Goãmʉ yare erã gojarapũ:

Īġu utāye iro dopa árīġure gamebirā dederea warācoma, arī gojañuma iribojeguerē.
 Eropa gojarā Jesucristore masa gamebiriburire ōpa arī gojamuhtañuma. Erā ġure gamebirā Goām̄u ya buherire yuħribirima. Cristore gamebirā, ġure tarinugarā, Goām̄u pohrogue ejasome erā. Erā eropa waborore apir̄u Goām̄u erāre.

Ōpa āħrima Goām̄u yarā, arī gojañumi Pedro

⁹ Muar̄u Goām̄u ġu beyenirā āħraa. Īġu mari Or̄u ġu yarā pahia ġu yare itamurā āħraa m̄u. Eropirā ġu ya curu majarā ñeri marirā Goām̄u yarā ta āħraa m̄u. Eropiġu muare naitiāro árībonirāre boyoror̄u árīmorāre, ñerire iibirimorāre, ōaripure iimorāre aīdiḡu árīmi muare. Eropa ta aīdiḡu árīmi Goām̄u m̄u ġu ōarire ġu ōaro iirare gajirāre weremorāre. ¹⁰ Ero coregue duhpimorā árībirimuririb̄u m̄u. Dohpague tamerare Goām̄u yarā āħraa m̄u. Ero core muare mojomoro ġabur̄u marinimi muare dohpa. Dohpaguep̄ure muare Goām̄u mojomoro ġaḡu āħrimi.

Goām̄u yare iirā árīque m̄u, arī gojañumi

¹¹ Yu mahirā, m̄u i um̄ure wari masa iro dopa āħraa dohpaguere. Goām̄u pohro wamorā ta āħraa. M̄u eropa árīrā árīc̄u, ire turaro werea muare: M̄u ñeri uaribejarire iibiricāque. Iri ñerire uaribejarā, ñerā warā iica m̄u. ¹² Goām̄ure gamebirā watope árīrā ōaro iirā árīque m̄u ġuare werewuari arīrā. M̄u eropa iirā árīc̄u muare dohpaguere ñero werewuadiaquererā m̄u ōaro iirire

masirācoma erã. Eropa masirã erã Goãmure “Õagũ, turagũ āhrimi,” arĩrācoma. Õpa ta arĩrācoma Cristo ĩgũ i yebague ĩgũ dujaricũ.

¹³ Mari Opũ yare iirã árĩrã õ majarã oparã sãre yũhrique mũa. I yeba majagure mũa árĩpehrerã tauro opũ árĩgure ĩgũ sãre yũhrique.

¹⁴ Goãmũ erã oparãre apipũ tarinũgarãre dipuwaja moamorãre. Eropigũ õaro iirãre “Õaro iibũ mũa,” arĩdoregũ apipũ erãre. ĩgũ eropa apicũ erãre yũhrique mũa. ¹⁵ Mũa õaro iicũ ĩarã, pee masibirã erã sihajaro mũare weresãdiaquererã ta weresãmasibeama. Eropigũ mũa õaro iicũ gahmemi Goãmũ.

¹⁶ Mũa ñecũ sũmarã árĩricũri doca árĩnirãre Goãmũ mũare taudigũ árĩmi. Eropa taunirã árĩquererã ta, “Gũare doreri mara. Eropirã gũa ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã āhraa gũa,” arĩ pepique mũa. Eropa arĩ pepirã ĩgũ dorerire iique mũa. ¹⁷ Árĩpehrerã masare mahi umupeoque. Mari acawererã Jesu yarãre mahi umupeoque. Goãmure gũhyadiaro ĩaque. I yeba majagũ opũ sãre umupeoque.

Cristo ñero tarigũ ĩgũ yujuro bojediro dopa ta yujuro bojeque mũa sã, arĩ gojañumi Pedro

¹⁸ Mũa pohro majarãre weregũ iiaa dohpague. Mũa õaro umupeori mera mũa oparãre yũhrirã árĩque. Õarã, mũare õaro iirã mera dihtare yũhrirã árĩbiricãque. Mũa mera guarã sãre yũhrique mũa. ¹⁹ Mũa ñero iibiriquerecũ, mũare erã dipuwaja moabocoma. Erã eropa dipuwaja moarare Goãmũ ĩgũ gamero dopa ta

irire mũa yujuro bojecũ “Õaro iiabũ mũa,” arĩgũcumĩ Goãmũ mũaare. ²⁰ Mũa ñero iira wajapũ erã mũaare dipuwaja moasũcũ irire mũa yujuro bojequerecũ Goãmũ “Õaro iiabũ mũa,” arĩsome. Mari õaro iiquererã erã dipuwaja moasũcũ irire mari õaro mera guaro mariro árĩcũ yujuro bojecũ Goãmũ marire õaro ñhasuagũcumĩ. ²¹ Eropã iimorãre ñgũ yarã árĩdoremi Goãmũ mũaare. Cristo sã mũa ya árĩburire ñero tarimi mũa ñgũre ñhacũboro dopa. ²² ñgũ ne ñero iibirimi. Eropĩgũ ne gũyabirimi. ²³ ñgũre turicũ, ñgũpũ erãre ne turi gamebirimi. ñgũre erã ñero iiquerecũ ta “Mũaare ñero iigũra,” ne arĩbirimi ñgũ. Eropĩgũ “Ahũ queoro dipuwaja moagũ ãhrimi. ñgũgue amugũcumĩ,” arĩ pepiñumi ñgũ. Eropirã mari sãre ñgũ iidiro dopa ta iiro gahmea. ²⁴ ñgũ Cristo ñgũ basi crusague mari ñeri dipuwaja sĩrimi. Eropã sĩrimi dipaturi mari ñerire iibiriboro dopa, Goãmũ gameripũre mari iiboro dopa. ñgũ ñero camicũmi marire peamegue wabonirãre marire taricũ iibu. ²⁵ Oveja erã dedereboro dopa ta mũa sã peamegue dederebonirã árĩribũ. Dohpaguepũre Cristore umupeorã ñgũ yarã wãhabũ pare. Eropĩgũ ovejare ñhadibugũ iro dopa Cristo mũaare ñhadibumi. Mũa sĩporã mera dederebiriborore õaro ñhadibumi.

3

Mojoto dirirãre õpa iiro gahmea erãre, arĩ gojañumi Pedro

¹ Eropigu pohro majarãre yu dorediro dopa ta mua marasã nomere doregura. Mua marapu sũmarãre õaro yuhrique erã Goãmũ buherire erã gameboro dopa. Yujurãyeri mua marapu sũmarã Goãmũ buherire gamebirã àhrima. Erãre mua yuhricũ ïarã Goãmũ ya buherire gamebocoma erã. Eropirã iri buherire mua erãre werebiriqerrecũ ta ïgu yare gamebocoma erã. ² Eropa ta gamebocoma mua erãre õaro iirire, mua umupeori sãre ïarã. ³ Mua nome, mua poarire wũapuwea seapatanirã nome, oro dari bũyanirã nome, õari suhri sañanirã nome árĩdiarire guñabiricãque mua. Mua ya dupũ masare ïhasuacũ iibiricãque. ⁴ Eropa iibirã õpa iique. Mua pepiri õaro árĩcũ guñaque. Eropirã mua guhyadiarã nome iro dopa gajirãre nijiyajaro mera iirã nome árĩque. Guhyadiaro mera weretamurã árĩrã ipure masare ïhasuacũ iique. Iripũ pehresome. Iri õatariari àhraa Goãmũ ïacũ. ⁵ Õpa ta iimuriñuma iribojegue majarã nome Goãmũ yarã nome. Erã nome Goãmure umupeorã nome árĩrã, erã marapu sũmarãre õaro yuhrimuriñuma. ⁶ Eropa Sara igo marapure Abrahãre õaro mera yuhrimuriñumo. Eropigo ïgure “Opũ,” arĩ piyumuriñumo. Eropirã mua õaro iirã nome árĩrã, güiri marirã nome árĩrã, Sara árĩdiro dopa àhraa mua.

⁷ Õpa ta mua marapu sũmarã sã mua marapo sãre õaro iique. Erã nome mari uma iro dopa turarã árĩbeamã. Eropirã umupeori mera õaro iique erã nomere. Goãmũ árĩpehrerinuri ïgu

mera mari árĩniguiborore ĩgu mware odiro dopa ta ogucumi erã nome sãre. Erã eropa árĩmorã árĩcũ erã nomere õaro iique. Goãmure mwa serẽrire ĩgu yuhriboro dopa erã nomere õaro iique mwa.

Õaro erã iiquerecũ ta gajirã erãre erã ñero iirire werepũ Pedro

⁸ I mera weretugura: Mwa árĩpehrerã yujuro mera õaro árĩque. Eropirã mwa mera majarãre õaro mojomoro ĩarã árĩque. Mwa acawererã Jesu yarãre pepuri majarã game umupeoque. Eropirã õaro iique erãre. Eropirã “Gajirãre masitaugu ãhraa,” arĩ pepibirã erã gamero dopa ta iique. ⁹ Gajirã mware erã ñero iicũ erãre ñero ii gamebircãque. Mware erã turicũ erãre turi gamebircãque. Mware erã eropa iiquerecũ ta õaro iique erãre. Eropirã õaro yuhrique erãre. Irire iimorãre ta apimi Goãmũ mware õaro iibu.

¹⁰ Eropa ta ãhraa Goãmũ yare erã gojarapũ:

Mwa õaro mucubiriri mera árĩdiarã ne ñero wereniguibircãque. ¹¹ Árĩpehreri ñeri iirire duhcãque. Õaripure iique. Game mwa basi ĩhaturiro mariro árĩque. Irire turaro iique. ¹² Õarãre mari Opũ eropa ĩhadibuniguicãgu iimi. Eropigu ĩgure erã serẽrire eropa peeniguicãgu iimi. Ñero iirãpũre ĩgu gamebeamĩ, arĩ gojañuma Goãmũ yare gojarapũque.

¹³ Õarire mwa turaro iidiacũ gajirãpũ mware ñero iidiaquererã ta ne yujuro bojesome. ¹⁴ Õaro mwa iiquerecũ ta mware erã ñero iicũ ĩagu

Goãmupũ mũare òaro iigucumi. Eropirã mũare ñero iidiarãre, “Mũare wejẽrãca,” arĩrãre gũibiricãque. Eropirã bũjawerebircãque. Irire pee guñaricũbiricãque. ¹⁵ Eropirã mũa Cristore “Gũa Opũ àhrimi,” arĩ pepirã, umupeoque ìgũre. Eropirã Cristore mũa umupeorire, Goãmũ mera mũa árĩborore, gajirã mũare serẽpibocoma: Erã mũare serẽpiboro core erãre yũhriburire òaro guñayuque. Eropa erãre yũhrirã nijiyajaro mera, òaro umupeori mera wereque erãre. ¹⁶ Òarã árĩque. Eropirã “Ñerire iiaa,” arĩ pepisome mũa. Eropirã Cristo yare mũa òaro iirã árĩcũ gajirã mũare ñeri quere moarã guhyasiuro warãcoma. ¹⁷ Ñerire mari iira dipuwaja mari ñero taricũ òabeaa marire. Eropiro Goãmũ gamecũ òarire mari iira dipuwaja mari gajirã mera ñero taricũ òapũrica iri tamera.

¹⁸ Eropa ta ñero tarimi Cristo. Yujusubu ta árĩpehrerã ñeri dipuwajare sĩrimi ìgũ. Òagũ árĩmi. Eropa árìgũ ñerã mari árĩcũ mari ya árĩborare ñero tarimi ìgũ. Ñero tarimi ìgũ Goãmũ yarã mari wacũ iibu. Ìgũ sĩria wami. Eropa sĩriquerẽcũ ta ìgũ sĩporã ojocariyoro. ¹⁹ Eropigũ ìgũ sĩporã mera sĩrinirã mũa erã dipuwaja moaburire corerã erã pohroque Goãmũ yare werepũ erã sĩporãrire. ²⁰ Erã mũrapũ iribojegue Goãmũre yũhribirimũriñuma. Irisubuguerẽ Noé ìgũ árĩrasubuguerẽ, wuadiru dohodirure dohogũ iĩñumi. Irirure ìgũ dohorisubu Goãmũre yũhribirinirã mũa erã yũhricũ gameriñumi. Eropigũ erã yũhriborore yoari

boje dipuwaja moabigu coreriñumi Goãmũ. Yũhribirimariñuma. Eropigu erãre dipuwaja moañumi. Eropirã bajamerãgã ocho dihta dia miririñere tariwereñuma. ²¹ Miricũ erã taridiro dopa ta marire waĩyecũ peamegue wabonirãre mari tariborore ãhmua. Deco mera marire waĩyecũ mari dũpũre mari gũhrrarire tu coero dopa árĩbeaa. Marire waĩyecũ ñeri marirã mari árĩborore Goãmũre mari serã. Eropirã Jesucristo ãgu masa mũriara mera peamegue wabonirã taria mari. ²² ãgu Jesucristo umarogue wadi árĩmi Goãmũ mera dorebu. Eropigu ãgu anyua tauro, umaro majarã oparã tauro, árĩpehrerã dorerã tauro erãre doregu ãhrimi.

4

Cristo yarã árĩrã õarire gohrotonirã árĩrãca, arĩ wereñumi

¹⁻² Mari ñero tarirã mari ñero iirire duhucãa mari. Eropã duhucãrã mari dipaturi mari uaribejarire iibea. I yeba mari árĩropẽ Goãmũ gamerire iiniguirãca. Eropirã Cristo ãgu ñero tarigu ãgu gũibiridiro dopa ta mũa sã ñero tariborore gũibircãque. ³ Iribojegue Goãmũre gamebirã erã ñerire uaribejadiro dopa ta iimũriyoro mũa. Gũhyasĩriro mariro ñerire iirã, ñeri uaribejarire iirã, mereri bosenuri iirã, Goãmũ dorerire tarinũgarã, goãmarã wãnirãpũre umupeorã iimũriyoro. Eropirã iripẽta iri ñerire iipurumujucãque pare. ⁴ Eropirã erã mũraro ta iirãpũ mũa dohpãguere iri ñerire erã mera iibircũ ãarã erãpũ ãha uca wahama. Eropirã erã mũapũre ñero

wereniguirã, querere goroweoma. ⁵ Erã eropiicũ ïagu erã ñeri iirare Goãmũpũ serẽpi ïagu, weretaridoregũcumi erãre. Ìgu ojocarirãre, sîrinirã sãre beyebu ãhrimi. ⁶ Ìgu eropa beyebu árĩgu erã sîrinirãpũre õari buherire werepũ Goãmũ mera erã õaro árĩniguiborore. Eropirã i yebare erã árĩpehrerã masa iiro dopa sîrinirã árĩquerecũ Goãmũ ìgu mera erã õaro árĩniguiborore werepũ erãre.

⁷ Pehreburinũ merogã duhyaa. Eropirã õaro pee masirã árĩque. Eropirã Goãmũre serẽniguicãque. ⁸ Gajirãre mari õaro mahirã baja gajiropa erã marire ñero iiquerecũ ta eropa ïacãa mari. Eropirã mũa mera majarãre burigã umupeo mahiniguicãque. ⁹ Mũa mera majarãre mucubiriri mera mũa ya wirigue ñajaridoreque. ¹⁰ Goãmũ ìgu yarã nũcũre ìgu yare mũa mohmemasiburi nũcũre apimi. Ìgu eropa apicũ mũa iimasiro dopa ta mũa mera majarãre ìrire õaro itamuque. Goãmũ mũa nũcũre mũa ìgu yare mohmemasiburi nũcũre apimi. Ìgu apirañe mera gajirãre õaro itamurã, Goãmũ ìgu apidiro dopa ta õaro iirã iiaa mũa. ¹¹ Eropirã mũa õaro wererã árĩrã, Goãmũ ìgu werebodiro dopa ta õaro wereque mũa sã. Masare itamurã árĩrã, Goãmũ ìgu apira turari mera gajirãre itamuque. Árĩpehreri mũa iira nũcũ Goãmũre masa erã umupeoboro dopa ìrire iique. Jesucristopũ mũa ìrire iicũ itamugũcumi. Ìgũre árĩpehrerinũri umupeoque. “Õagu, turagu ãhrimi,” arĩro gahmea árĩpehrerãre. Eropa ta arĩporo.

Jesu yarã erã árĩri dipuwaja erã ñero taririre were gojañumi Pedro

¹² Yũ mahirã, dohpaguere ñetariaro tarirã, “Gajiropa árĩro wáca yũre,” arĩ guña iibiricãque. Mucubirirã árĩque. ¹³ Bujawerebirã ta mucubirirãpũ árĩque. Eropirã “Cristo ñero taridiro dopa ta gua sã eropa ta wahaa,” arĩ mucubirique mũa. Eropa mucubirirã Cristo ñero òarire ñero ñhmũgũ dujaricũ mũa turaro mucubirirãca. ¹⁴ Cristo yarã mũa árĩri dipuwaja gajirã mũare erã turicũ Goãmũ ñero Espĩritu Santo ñero òagũ mũa mera árĩgũ iimi. Eropirã òaro mucubirirã ãhraa mũa. ¹⁵ Eropirã masare wejẽra waja dipuwajacũrã, yajara waja dipuwajacũrã, ñero iira waja dipuwajacũrã, gajiropa arĩ goroweora waja dipuwajacũrã árĩbiricãque. Iri dipuwaja mũa ñero taricũ ñehe ãhraa. ¹⁶ Cristo yarã mũa árĩra wajapũ ñero taricũ òhaa. Eropirã Cristo yarã mũa árĩcũ ñha ñero iima mũare. Erã eropiicũ gũhyasĩribiricãque. Ñero tariquererã ta Cristo yarã mũa árĩrĩre mucubirirã, Goãmũre “Òhaa,” arĩ umupeqũ mũa.

¹⁷ Goãmũ ñero yarã erã iirare ñero beyerisubũ árĩro iiaa dohpaguere. Árĩpehrerã mari ñero yarã mari iirare ñha serẽpimũhtagũcumĩ. ¿Eropa marire serẽpimũhtagũ dohpã iigũcuri ñero yarã árĩbirãpũre mũa pepicũ? Ñero yũhribirĩnirãpũre turaro dipuwaja moagũcumĩ. ¹⁸ Eropirã òarã ñero yarã eropa ñero tarira pũhrũ Goãmũ erãre tau erãre ñero pohro aĩagũcumĩ. Goãmũre gamebirãpũ ñetariaro tarirãcoma. Eropirã dederea wa peamegue

warãcoma. ¹⁹ Eropirã Goãmũ ïgu gamecũ mũa ñero tarirã árĩrã, õarire mũa iirare duhubiricãque. Eropirã mũare ïhacũnugudigũre mũare ne duhubigũre ïgũre umupeoro gahmea. “Yũre ïhadibugũcumi,” arĩro gahmea.

5

Jesu yarã erã iiborore were gojañumi Pedro

¹ Dohpaguere mũare Jesu yarã oparãre weregũra: Yũhũ Jesu yarã opũ ãhraa. Mũa sã erã oparã ta ãhraa. Mũare yũ iro dopa oparã árĩrãre ire werebu iiaa yũhũ: Cristo ïgu ñero tarirare ïadigũ árĩgu, mũa mera umarogue Cristo mera õaro árĩniguibu árĩgu ire mũare weregũra: ² Goãmũ yarã oveja iro dopa ãhrima. Mũaapũ ovejare ïhadiburã iro dopa ãhraa. Eropirã Goãmũ mũare ïgu apinirãre ïgu yarãre õaro ïhadibuque mũa. Eropirã Goãmũ ïgu gamediro dopa ta õaro sĩporãcũri mera erãre ïhadibuque. Eropirã erãre ïhadiburã “Niyerure wajatarãca,” arĩ pepibiricãque mũa. ³ Eropa ïhadiburã erãre pũriro mera dorebirabiricãque. Eropirã õaro iique mũa Jesu yarã mũare erã ïhacũboro dopa. ⁴ Mũa eropa iirã Cristo marire árĩpehrerãre ïhadibugũ ïgu dujaricũ ïgu mũare õarire oburire oparãca. Iri mũa opaburi ne pehresome.

⁵ Erãre yũ dorero dopa ta mũa mamarã sã erãre mũa oparãre yũhrirã árĩque. Eropirã mũa Jesu yarã árĩpehrerã game yũhri árĩque.

“Õatariagu ãhraa,” arĩ pepirãre Goãmũ game-beami. Gajirãre umupeorãpũre “Bu árĩrã

ãhraa,” arĩ pepirãpure ðaro mahi ita-
mumi ïgu, arĩ gojara ãhraa.

⁶ Eropirã Goãmũ turagupure mware dorecũ
yuhrique. Eropirã mwa basi “Yu ðagu ãhraa,”
arĩ pepibiricãque. Mwa eropa ðarire iicũ
ïagu Goãmũ ïgu queoranũ árĩcũ masa ïhuro
mware “Õarã ãhrima,” arĩ ïhmuçumi.
⁷ ïgu mware wwaro pepi ïhadibumi. Eropirã
ïgure guñaturarã, ne wwaro bujawere
guñaricubiricãque mwarũ.

⁸ Mware ïhaturigu watĩ yee guagu ïgu ehma
baro iro dopa ta ãhrimi. Mware ñero iidoregu
goroweodiami. Eropirã pee masi árĩque.

⁹ Árĩpehrerogue sãre gajirã Jesu yarã eropa
dihta teboricuma watĩ goroweodiari mera. Irire
masirã ïgure yuhribiricãque. Eropirã Cristore
umupeorã turaro guñaturaque mwa. ¹⁰ Mwa
i yeba árĩrisubu dihta watĩ ñero iidorediaro
mera teboricurãca. Merogã ãhraa. Pũhrũ
mwa Jesucristo pohro árĩrã, mware ðarã tu-
rarã árĩcũ iigucumi. Eropigu mwa siñajarã
ðaro árĩcũ iigucumi mware. ïgu Jesucristo
iira mera árĩpehrerinuri umusigue mwa ðaro
árĩborore mware apigucumi. ïgu Goãmũ ãhrimi
árĩpehrerãre mojomoro ïagu. ¹¹ Eropirã umuri
nucũ “ïgu turagu ãhrimi,” arĩ umupeorã ïgure.
Eropa ta iirã.

Õadoretuñumi Pedro

¹² Ipũgãre miripũgãre yũ mware gojabeocũ
Silvanopũ yure gojabasami. Silvano Jesu yagu yũ
acaweregũ Jesure duhubigu ãhrimi yũ pepicũ.

Muare ðaro werediaa. Eropigu "I buheri diaye ta Goãmũ muare ãgu mahiri buheri ãhraa," arĩ weregu muare ipũre gojabeoa. Eropirã i buheri mera sĩporã turarã árĩque mua.

¹³ Muare ãgu beyediro dopa ta Jesu yarã Babilonia majarã sãre beyedigũ árĩmi Goãmũ. Erã muare ðadorema. Marco sã yũ magũ iro dopa árĩgu sã muare ðadoremi. ¹⁴ Mua mera majarãre bocatĩrirã ðaro mera mojoto ñeaque.

Árĩpehrerã muare Jesucristo yarãre gua ðadorea. Eropa ta árĩque. Iripẽta ãhraa.

Goãmu Yare Wereripu

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1